



**SEYCHELLES
NATIONAL PARTY**

Nouvo **Vizyon**

Newsletter - Vol. 21 Nimero 1 (18 Zanvye 2012)

25 Zanvye 2012: Nou Anvi Lazistis

Le 25 Zanvye 2012 i devret vin pour tou Seselwa ki pe debout pour lazistis, laliberte ek drwa lekspresyon en zour vreman enportan. Le 25 Zanvye i mark sa zour ki kes Mr. Ralph Volcère pou ganny ekoute devan Lakour Siprenm. Zot a rapel sa i en kes kot Mr. Volcère dan journal Nouveau Weekly ti fer serten komanter lo kes ki PDM ti'n mete kont Komisyon Elektoral konsernan rezilta eleksyon.

En Kes ranpli avek Malis

Lo nou kote dan lopoziyon, nou konn tou detay sa kes. Nou konnen lekel ki ti pran linisyativ pou sarz Mr. Volcère, lekel mazistra ki ti dan biro Atorni Zeneral pou prepar sa kes, lekel Ziz ki ti donn konsey e lekel ki ti dir fodre fer tou keksoz o-pli vit posibil. Annou pa oubliye ki zizman devan Lakour Dapel ti donn Vandredi bomaten e tou bann dokiman ti fer deswit apre, e Mr. Volcère ti ganny summon 6.30 diswar Vandredi pour li aparat devan lakour pou ganny zize Lendi 9er bomaten. Si sa pa apel malis ki mannyer i apele?

Napa ni Letan pou Prepar Kes

En lot keksoz ki montre nou ki lentansyon gouvènmman ti napa nanryen pou fer avek lazistis ti lafason ki Atorni Zeneral, Mr. Govinden ti ensiste avek ziz ki fodre kes i ganny ekoute deswit. Letan avoka Mr. Mr. Volcère, Mr. Derjacques ti met devan bann prensip lazistis e legal, Mr. Govinden ti vin nerve e kriye dan lakour. Eski tou sala pa montre nou ki lentansyon gouvènmman sete pou servi lenzistis pou senpleman protez sa ki li i anvi? Pourtan i annan en kantite dimoun ki lo detansyon plis ki detrwa lannen!

Lalit pour Lazistis i Lakle

Fodre ki tou Seselwa i konpran byen ki lalit pour lazistis i sanmenm sa deba pli enportan pour Sesel. Letan napa lazistis tou dimoun e tou lenstitisyon i ganny afekte. Ou drwa koman en sitwayen pa ganny rekonnet e lotorite i fer ou vin en lesklav. Se pour sa ki SNP pe tou-l-tan demande ki nou koste ansanm pour nou debout byen for pour drwa sakenn de nou. Se sa ki pou permet nou fer progre dan nou lavi e resevwar tou respe ki nou merite. Fodre zanmen krwar lalit pour lazistis i ganny rezerve pour detrwa dimoun selman. Nou tou nou enkli dan sa lalit.

Fodre prezerv Laliberte Lekspresyon

Tou Seselwa i bezwen osi konpran ki i enportan pou prezerv drwa laliberte lekspresyon. San posibilite pou eksprim nou lopinyon, resevwar

lenformasyon e devwal tou bann trik ki pe arive dan nou pei, nou pou kontinyen desann dan en gran presipis. Se sa ki sa gouvènmman i anvi, me se sa ki nou, koman en pep, nou devret anpes arive. Se pour sa ki nou bezwen desann le 25 e montre nou solidarite. An fezan sa, nou ava pe dir klerman ki nou anvi prezerv laliberte e nou kondann tou aksyon ki met nou dan fernwanr.

Ou kapab Kont lo SNP an 2012

O-komansman en nouvo lannen, nou donn tou Seselwa en sel parol: Kont lo SNP pou debout pour ou drwa. SNP pa bann zida, ni bann tret. Ansanm ek Mr. Volcère ek Mr. Boullé, nou reprezant vre lopoziyon dan Sesel. Nou pa ni kameleon ni Zida. Nou pe travay pour en meyer Sesel kot i annan en laplenn nivo kot tou Seselwa i kapab ganny menm loportinite e kot tou Seselwa pou viv dan laliberte.

**Tou Seselwa ki krwar dan LAZISTIS,
LALIBERTE ek DRWA LEKSPRESYON
i devret desann kot Lakour Siprenm pou
donn Mr. Ralph Volcère sipor dan son kes ki
Ziz Mathilda Twomey ek gouvènmman in
anmennen kont li. Ziska kan eski Seselwa
pou reste trankil e les sa gouvènmman fer sa
ki i anvi avek nou? Tou dimoun ki pe soufer
okenn lenzistis, parey bann travayer Air
Seychelles i devret osi desann. Randevou le
25 Zanvye 9er bomaten kot Lakour Siprenm**

Politik Sal i detri Air Seychelles

Tou Seselwa ozordi i rekonnèt ki i annan tro bokou lipokrizi ek traizon dan Sesel. Ka Air Seychelles i en lot lekzanmp ki ilistre sa byen menm. Ozordi i annan tro bokou larm krokodil ki pe ganny verse par sa bann menm dimoun ki ti dir zot pou detri Air Seychelles e par sa bann ki koz lo protez travayer, me selman zot menm ki zwe pli gran rol pou pous travayer. An menm tan i annan ki pe dir pa fer Air Seychelles vin en size politik, me selman se sa bann menm dimoun ki kontakte bann politisyen Parti Lepep pou determinen lekel ki sipoze ganny pouse. Bann gran ipokrit ki pler larm krokodil!

Prosedir pous Travayer

Lenformasyon konkret ki nou'n resevwar i montre ki letan ti ariv ler pou pous travayer in annan en gran determinasyon politik. Pouse pa'n ganny baze lo konpetans travayer oubyen lo abilite. Me in plito lo si

sa dimoun i siport sistenm oubyen non. Me pou esey kanmoufle sa, zot in osi met serten dimoun ki siport Parti Lepep deor. Sepandan dimoun dan sa kategori in deza ganny promet lezot travay oubyen kontra afen ki zot kapab debourye. Sa bann ki siport lopoziyon in ganny zete menm si zot ti pe fer zot travay byen. Sa i en keksoz ki menm bann ki ti siport Parti Lepep pe koz lo la.

Non Travayer dan Biro Brans

Bann politisyen Parti Lepep dan bann distrikt ti ganny demande pou tyek serten non bann travayer. Triyaz in komans la. En premye lalis ti ganny prodwi e apre en dezyenm lalis ti ganny travay lo la. Menm si zofisye Air Seychelles in esey gard meyer staff State House pa'n enterese e prefere pous sa ki dan lopoziyon. I kler ki se politik ki'n annan dernye mo. La zot ti fer vreman sir ki se lopoziyon ki'n ganny met deor e siporter Parti Lepep i ok.

Travayer Eksperyans: OUT!

Sa bann sinema ki'n pase dan met sa premye group travayer deor i vin pli kler letan ou war ki travayer Air Seychelles byen eksperyans e fidel in ganny dir ale, tandi ki bann ki'n fek reganny anploye avek move rikord, me senpleman pour rezon politik in ganny garde. Eski sa pa fer nou poz keston lo ki vre direksyon Air Seychelles i anvi ale? Oubyen eski pa i montre nou ki zot pa ni konnen dan ki direksyon zot pe ale?

Solidarite avek travayer

Move planifikasyon in fer en kantite zenn travayer ki annan fanmiy ek det perdi zot travay o-komansman lannen. Politisyen ki sipoze pran lentere tou travayer in les zot tonbe e les zot politik pran pli gran konsiderasyon. SNP ek lopoziyon i debout lo zot kote e nou eksprim nou sipor ek solidarite. Nou osi demann zot pou pran kouraz e debout avek nou dan sa lalit.

Sesel i latet-anba!

Lannen pase, James Michel ek Parti Lepep ti kriy byen for 'Viktwar pour Sesel'. La sa lannen sa menm James Michel i swazir koman tenm 'Travay dir pour Sesel'. Vreman sa pei in bite. Depi kan eski laviktwar ti vin avan travay dir? Sa i montre nou ki sa bann dirizan sa pei in sitan pran Seselwa pour bann enbesil ki zot krwar zot kapab dir nou nenport kwa e nou pou anvale. Ziska kan eski sa kalite latetid pou renye dan nou pei?

Nou pei pe viv latet-anba, e tan ki Seselwa i pare zis pou asize e les sa bann gran savan tret nou parey zot anvi, zot pou fer sa ki zot anvi. I kler ki tou dimoun i bezwen met zot lipye ater pour ki keksoz i sanze e al dan en nouvo direksyon.

2012 i devret vin en lannen kot tou Seselwa i travay dir avek son latet. Fodre ki sa lespri ki Bondye in donn sak Seselwa i ganny servi byen pou prodwir bann bon fri. Se sa kalite travay dir ki pou fer nou war tou trik sa bann politisyen e fer nou reklanm nou pei pour Seselwa.

Azanda SNP 2012: Reform Elektoral

Dan tou staz developman en pei, serten keksoz i pran plis priorite e sakrifis i bezwen ganny fer. Dan SNP e dan vre lopoziyon dan Sesel, nou ti decide boykot eleksyon Lasanble pour en sel rezon: Bann lalwa e kondisyon ki govern bann eleksyon pa zis e Sesel i bezwen reform elektoral.

Sa sakrifis in kout lopoziyon en kantite, me nou pe fer li pour Sesel. Se pour sa rezon ki nou langazman dan proses reform i profon e serye. Nou anvi war pei annan bann bon lalwa pour ki laplenn i vreman nivo e tou politisyen e parti politik i ganny menm sans.

SNP ti fer kler son lentansyon apre elesyon prezidansyel. Nou ti boykot tou lezot travay Lasanble eksepte travay ki annan pou fer avek reform

elektoral. Nou ti anmenn mosyon atraver Mr. Bernard Georges pou montre lafason ki nou serye e anvi war keksoz bouze.

O-komansman 2012, nou anvi fer kler ki reform elektoral i reste nou priorite. Nou pou partisip dan travay sa Forum Reform Elektoral pou esey donn Sesel bann meyer lalwa posib.

Seselwa, sa travay i en travay tre enportan e nou pa pou ezite pou donn li tou son lenportans. Nou espere ki tou dimoun i ava pran li serye e met bann pwen valab devan. SNP in deza ekri plizyer papye lo sa size, e pandan sa bann mwan ki devan nou, nou pou fer plis ankor.

Sesel i bezwen sa ki meyer. SNP lontan pe travay dir pour Sesel. Nou pou kontinyen fer li aköz nou kontan nou pei.

Gard Fouter Dezord ti dan liniform le 1 Zanvyè

Vreman dan sa pei bann sef i koz en koze, me letan i ariv ler pou pran aksyon, i en lot keksoz ki zot fer. Sa gard fouter dezord ki ti tir 'tear gas' lo bann inosan ki ti'n swadizan ganny sispann ti dan full liniform le 1 Zanvyè dan sa seremoni avek Prezidan Michel. Eski sa i reflekte lo James Michel ki kontan sa kalite gard fouter dezord oubyen lo lapolis ki pran tou dimoun, enkli James Michel koman bann lenbesil? Petet Marceline i devret demann James Michel ki ipanse lo sa gard?